



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 10

Shillong, Tura, Jowai nung tenokdangba agütsütsü

Mulungsoa plasma tenla agüjang: Rishabh Pant



VOL. XVIII NO. 194 (ADOK 194) DIMAPUR

YANGTEPNÜ (THURSDAY)

RONGCHII (APRIL) 29, 2021

₹ 5.00

DC Dimapur ajanga gari senzusemponger atema metetdaksü

Dimapur, Rongchii/April 28 (TYO): Four lane lenmang yangluba tajungtiba nung renloka inyaktetsü aser nüburtum kumzüka ayutsü mechi Chathe River Bridge (Patkai junction) nungi Kukidolong Village tashi gari senzusempongba ajunga agüja aliba anogo/mapangtem nung nokdangtsü, ta Deputy Commissioner, Dimapur, Rajesh Soundararajan ajanga sangdong ka nung metetdaksü.

1. May 1, 2021 nikongdang 7:00 ako nungi May 3, 2021 anepdang 5:00 ako tashi.
2. May 8, 2021 nikongdang 7:00 ako nungi May 10, 2021

anepdang 5:00 ako tashi. Tekeratiba nung lenmang yangluba maparen inyaktetsü, nisung yiruba aser takumsamaba aser ki-o-jen raksaba nungi kumzüka alitsü mechi iba tenokdangba ya agütsür, ta sangdong ajanga ashi.

Iba mapang nüburtum dang Dimapur nungi Kohima / Kohima nungi Dimapur bushitsüpur gari tilatem (light vehicles) 7th Mile - New D.C office - Shokhuvi - Razaphe- Mhaikam - Pimla - Mhainamtsi- Jhornapani/ Medziphema lenmang ajanga senzüa atatsü ajungshir, ta kasa sangdong ajangasa ashi.

State nung Helicopter service anena atar

Dimapur, Rongchii/April 28 (TYO): State nung helicopter service hopta shia agütsüba, medical evacuation aser tongtipang nisungtem anir senzüba maparen ajak tang nungi tenzüka tarutsü nung osang ka magütsü tashi anena atar, ta sangdong ka ajanga ashi. General Manager, Nagaland State Transport ajanga sangdong ka nung ashiba agi,

tayimtsü (helicopter) anir ana dak COVID-19 aliba jangjatetba aser tanünga pilot, engineer aser ground staff dak iba tashidak tendangba osang maru aliba ajanga iba mera ya agütsüsa akumer.

COVID protocol nung shia aliba ama tanünga ketdangsurtem ajak quarantine nung lir, ta sangdong ajangasa ashi.

DoH&FW-i vaccine agitsü atema tenung züngoksemtsü metetdaksü

Dimapur, Rongchii/April 28 (TYO): MoHFW-i sangdongba ama arishi küm 18 nungi 44 tsüngda alirtem vaccine agitsü aliba dak sendakba nung Department of Health & Family Welfare-i temsüa aliba lisopurtem atema tetuyuba kar agütsüogo.

Arishi küm 18 nungi 44 tsüngda alirtem shirnok temsüa lir aser vaccine agitsü mulunger p a r n o k i selfregistration.cowin.gov.in aser Arogya Setu App sendanga COVID-19 vaccine agitsü atema tenung züngoksemtetsü.

State/Department-i, CoWIN portal ajanga vaccine peria ali mali aser mapanglem indang sangdongba sülenang Beneficiaries temi vaccine agitsü atema anogo/mapang mekazüka yutetsü.

April 26 nü GMSD Kolkata nungi state-i Covishield vaccine dose lakh ka bener aruogo.

State/ UT tem nem vaccine ya criteria asem nung ajemdaker agütsütsü. Mezüngbuba nung inyakyim (Anogo tenet tsüngda vaccine agiba average), tanabuba nung covid agi shirangertem kwi ali aji asadanger agütsütsü aser tasembuba nung CO-WIN data dak ajemdaker vaccine laluba (covid-19 vaccines data base densema). States/UT tem nem vaccine kwi agütsütsü iba indang osang ya taruba hopta ana atema jelia state/UT tem nem metetdaksütsü.

Takaratiba nung nisung timba nem vaccine agütsütsü atema state-i GOI aser vaccine yanglurtem den tongtepratepdar, ta kasa sangdong ajanga metetdaksü.

DoSE-i class 1 admission indang osang agütsü

Dimapur, Rongchii/April 28 (TYO): RTE Act, 2009 aser NEP, 2020 kübok provision tem dak ajemdaker Directorate of School Education-i, tanur arishi küm 6 aser temapurtem nem Class 1 nung admission agitsü asoshi temelaba agütsütsü, ta metetdaksüogo.

Maneni Pre-school/anganwadi/balvatika nung tanur arishi küm 3 nungi 6 tsüngda alirtem nem admission agütsütsü. Iba tetuyuba ya osang

agütsüba mapang nungi benoka inyaksangshitsü aser tanur shirnok osang magütsü tsüngda tetuyuba ama mesüi Pre-Schools/ Class 1 nung admission agiatokogo, parnoka kasaji dang inyaksangshitsü melatsü.

Nagaland kübok aliba school tekolaktem ajak dang iba tetuyuba sülen metsüngareta anidaktsü tetuyuba agütsüogo.

Iba tetuyuba ya April 15 nü sorkari tetuyuba agütsüba dak ajemdaker agütsüogo.

Nagaland nung COVID-19 agi meneper nisung 13,569 jungogo

Kohima, Rongchii/April 28 (TYO): Bodhbarnü Nagaland nung nisung tasen 124 dak COVID-19 jangjateta state nung tang tashinung iba tashidak agi meneper ajak senteper nisung 13,569 kumogo, ta health ketdangsur kati ashi.

"Tanü COVID-19 positive cases 124 liasü. Dimapur nung 107, Kohima nung 11, Mokochung nung asem, Mon nung ana aser Tuensang nung ka. Aser Nisung 32 taneptsü nguogo. Kohima nungi nisung 29, Longleng nungi nisung asem," ta Health Minister S Pangnyu Phom-i tweet asü.

Item caseload nungya taneptsü angur nisung 12,183 aser tang active 952 alitsü, ta pai ashi.

State nung COVID-19 nungi taneptsü anguba ya Mongulbarnü shilem 90.37 liasü aser Bodhbarnü 89.79 liasü, ta State Nodal Officer for Integrated

Disease Surveillance Programme, Dr Nyanthung Kikon ajanga anogoshi COVID-19 osang sangdongba mapang ashi.

Dimapur aser Kohima nung shiranger kaka asüba ajanga state nung iba virus agi asür nisung 101 ajunger, aser item rongnung danga tashidak keta alir nisung ter aser ka asüba kuli tejangja bushiba mapang lir, ta pai ashi.

COVID-19 agi shiranger nisung 333 tashi tanga state temi ogo, ta pai ashi.

Tang active alirtem rongnung nisung 49 dak iba tashidak agi timtem agütsüba sümia lir, nisung 23 tera timtem ajurua oxygen inoka lir, nisung 7 kanga sashia kangshia oxygen inoka lir, nisung asem dak ventilator amshir aser nisung 870 dak iba tashidak agi timtem agütsüba mali, ta pai ashi.

Nagaland nung tang tashinung COVID-19 tashidak alitsü südi ta temolung melemi sample

1,45,547 tendangogo. Item rongnung RT-PCR ajanga sample 78,230, TrueNat ajanga sample 38,107 aser Rapid Antigen Test ajanga sample 29,210 tendangogo, ta Dr. Kikon-i ashi.

Kasa mapang Nagaland nung Deobarnü tashinung nisung 1,51,560 nem Covishield mozü doses 1,91,133 agütsüogo, ta State Immunization Officer, Dr. Ritu Thurr-i ashi.

State nung iba mozü agir alirtem rongnung frontline worker 47,764, healthcare nung inyaker nisung 14,325 aser arishi küm 45 tema aser teintet rogo nungi nisung 89,471 alitsü, ta pai ashi.

COVID-19 mozü dose tanabuba agir nisung 39,573 jungogo, aser item rongnung frontline worker 23,615, healthcare worker 9,614 aser arishi küm 45 dak tema aser teintet rogo 6,344 alitsü, ta Dr. Thurr-isa ashi.

Mekümdangba agi state nung coronavirus tali puteter: Dr Medikhru



Kohima, April 28 (TYO): Bodhbarnü Health & Family Welfare Department Principal Director, Dr Kevichusa Medikhru-i, nüburtum mekümdangba aser coronavirus anema tetuyuba shidak mebenshiba agi Nagaland nung

coronavirus tashidak tali puteter, ta metetdaksü.

Kohima nung osangbenertem den jembidang pai, nüburtum mekümdangba, wara anema tetuyuba balala mebenshiba aser kecha masü amai mashie senzüba agi anogo

shia iba tashidak timba-timba puteter, iba dak alia tangalen nungi meyipa arurtem ajanga-iba tashidak timba puteter, ta metetdaksü.

Talisa Dimapur nung iba tashidak timba putetba dak sendakba nung pai, tang amai ano maneni tashidak timba-timba putetra Dimapur meshimeshia shibangtsü, ta metetdaksü.

Dimapur nung anogo shia timba-timba putetba ya tesem balala nung tendangba aser tangalen nungi arurtem dak tendangba ajanga lir, anungji Department-i tanga districts nung Chief Medical Officers (CMOs) danga timba tendangtsü metetdaksüogo, ta pai ashi.

(Maneni tapak 10 nung...)

6.4 magnitude menoknok kati Assam anokshi

Guwahati, Rongchii/April 28 (Agencies): Bodhbar anepdang 6.4 magnitude menoknok kati lower Assam anokshitsüogo aser iba ajanga ki aika raksatsüogo. Ajisüaka iba lendong nung nisung asüba osangbo kecha mali.

National Centre for Seismology-i ashiba agi, menoknok ya anepdang 7:51 nung anak aser epicenter ji Sonitpur district nung liasü. Iba menoknok ka second 30 shi anoka liasü.

Mezüngbubu menoknok anokba sülen ghonda ishika tsüngda Richter scale 4.7 nungi 3.6 tashi nung aftershock aiben aruba ajangshiogo.

Guwahati nung apartment block ishika aser five-star hotel; Taj Vivanta Hotel densema ki aika tapok adoka anoksatsüogo aser iba den longru jara dena raksaogo. Nagaon nunga ki ana kanga mejungi raksaogo.

Menoknok anoba epicenter; Dhekiajuli nunga alu anensar tapok nungi tzü ayimba osang angazükogo. Maneni Tezpur jila nunga kitem raksaba osang sangdongogo.

Ato Kilonser Narendra Modi, Union home minister Amit Shah aser DONER (ministry of development of north eastern region) minister Jitendra Singh nungeri tensa asadangtsü atema chief minister Sarbananda

Sonowal den phone ajanga jembigo.

"PM Narendra Modi-i phone ajanga jembiba mapang menoknok agi teraksatsüba bener arutsüba asadangogo aser Assam nem takokba tashi teyari agütsütsü nangzükogo," ta Sonowal-i tweet asü.

National Centre for Seismology-i ashiba agi, mezüngbuba aftershock ya anepdang 8:03 nung 4.7 Richter scale nung anak aser 8.25am (3.6) nung ka aser tatema 8.44am (3.6) nung anak ta ashi.

Menoknok anokba ya North East state tem aser kidanger linük Bangladesh, Myanmar, Bhutan aser China nunga ajangshiogo.

Kohima nung Agri & Allied Departments senden amen



Dimapur, Rongchii/April 28 (TYO): State nung timtem aser tetsükdaktsü balala indang onüktem jembitsü asoshi Agriculture Production Commissioner, Kikheto Sema, IAS ajanga Nagaland Civil Secretariat Conference Hall, Kohima nung April 28, 2021 nü Nagaland nung aliba Agri & Allied Departments ajunga den senden ka ayonga mena liasü.

Nagaland nung tang tsüngsarusa tensa ka lir ta state kübok tesem balala nungi osangtem arur, tzü peria maliba aser tzünglu maruba ajanga metsüjangnatsü memokor, aser metsüjangnatsü kar mokoba süogo, ta APC ajanga ashi.

Rer tsükba aser mesen tabu balala ajanga aonsotsü chitsüba ajanga state nung moko-mersü peria madoker. Ajidang masü kiset shiruru metsüba nunga African Swine Flu aser ano tepang aser tetsüng nung komulongra adoka timtem agütsüba osangtem lir, ta pai ashi.

Iba ama tensa khenyongi balaka aliba mapang mera khenyongi balaka agütsü nüngdaker, anungji Agri & Allied Departments temi state nung nüburtemi ajangshiba timtem aser tensa azüoktsü aser

Nüburtem ajak anidaktsü atema DC Peren-i tetuyuba kar agütsü

Dimapur, Rongchii/April 28 (TYO): State nung Covid-19 agi shiranger timba akümba temulungdang yur District nung Covid-19 tashidak menatempa aoba nokdangtsü atema jenjang tapet agütsü nüngdakba angateta DC Peren, Sentiwapang Aier, NCS-i tetuyuba kar agütsüogo. Peren distict ya commercial centre ansa lir asünung jenjang tapet agütsü nüngdaker ta angateta tetuyubatem agütsüogo.

Osang tejangja ka magütsü tashi Peren District nung hopta shia lapokba shishilembadakter lapoktsü atema melelatsü. Local chiyongtsü/oset ayoba local shishilembartem dang hopta shia amenba shishilembadaker yokyatsüyatsü melatsü. Item shishilembartem yagi, mask asema, hand sanitizers amshiba aser tetsüngda ita inyaksangshiba amala Covid-19 dak sendakba inyakyim shidak benoka inyaksangshitsüla aser sorkari mapang shia agütsüba SOP tem sülen tashi anga anidaktsü nüngdaker.

Tanga state nungi arurtem ajaki district tonga aruli CHC

koktettsü mera agütsüla, ta APC ajanga ashi.

State nung nütsüng yongsük shilem 70 shi yimdam-yimtsüng nung alir aser aluyimer timba lir, anungji Agri & Allied departments nung takotet ketdangsurtem lungjemer aluyimer khuret bongdoktsü mapang lir, ta pai ashi.

Tashidak wara agi alima ajunga süngaka aluyimba manentsüla aser asenok renema alitsü nüngdaker. Asenok jakdang tebilemstü khuretem aliba koktettsü atema department tsüngta amalitepa, osang agitema, tamang kateta shilem agütsü nüngdaker, ta pai ashi.

Paisa state nung aliba nüburtem dang atsüki nung 'kitchen garden' anepalutsü ajungshia liasü.

Kikheto Sema-i Agriculture aser Horticulture Department tem dang metsüjangnatsü raksar aliba tekeratiba nung melentsütsü ashi, aji asünung dang aluyimer temi tsüngkum shidak nung metsü yoka züsentettsü.

Paisa danga nung amshitsü lemsüka aliba sen agi metsüjangnatsü alitsüla, ta ashi.

APC ajanga Veterinary Department dang nüburtem nem kiset shiruru metsüba tsütsü nashi

Jalukie nung amendaker aliba District Control Room (8732481972/9402728560) nem osang agütsütsüla.

Mhainamtsi, Heningkunglwa aser Peren-Maram nung amendaker aliba Police check-post tem nung District-i aiterem ajak indang osang tejangja mangaoka ayutsü, kong tongteprateptsü atema osang tejangja aser identity proof copy ka meshidena ayutsüba densema lir.

Commercial gari anishirtem ajaki passenger tem indang osang tejangja bendena ayutsüla aser SOP dak ajemdaker senzüsenpongtsü atema tetuyuba agütsür aliba sülen anidaktsüla.

Commercial gari anishirtem-i, tanga passenger tem den meyoktepa Covid-19 agi shirangertem anir mesenzütsüla.

Yimtsüng mesera kiyong ketdangsur ajak dang Village Task Force/Ward Task Force amenoktsü tetuyuba agütsü aser VTF/WTF temi parnok tawabangba kübok aliba tesemtemi tanga state nungi arurtem ajak indang osang

aser ak kisüng masü saka naponng aser an metsütsü angazükdaktsütsüla, ta ashi.

State nung chiyongtsü adokdaktsütsü asoshi ango metsüba ya lenmang ka lir anungji Fishery Department ajanga nübur dang ango metsütsü ajungshitsüla, ta pai ashi.

Pai Sericulture Department dang silk worm (longtang) metsütsü asoshi awareness agütsütsü ajungshia liasü.

Agriculture Production Commissioner, Kikheto Sema, IAS ya Jal Shakti Abhiyan atema Nodal Officer ka lir, aser pai temolung agüja tzü wazüka ayutsü aser tzünglu tzü rizünga ayutsü atema senden nung jembia liasü.

Tzü wazüka ayutsü aser tzü nungi adokba rongsen tem ketdangtsütsü atema Land Resource Department, Water Resources Department, PHED lungjemer inyaktüla. State nung jila aser yimtsüngtem nung "Catch the rain, where it falls, when it falls" omen kübok tzü wazüka aser bendena ayutsü atema temolung agüja inyaktüla, ta Kikheto Sema-i ashi.

Kikheto-i state tesem ajungalen süngtong atemtsü indang onüka süoka jembia. Nagaland ya rongsen agi anünga aliba state ka lir aser senotsü tsütsü Center nem teyari agütsüba mali, ajisüka ajak ajungtsü mechi libajen wazüka ayuba nung Nagaland-i shilem agitettsü, ta ashi.

Pai State sorkar kübok department ajak dang pei office temeket nung tazüng alidak süngtong atemtsü ayongzük aser ano school, NGO aser arogotem dang süngjang atangba süngtong atemtsü ajungshia liasü.

Iba senden nung Agri & Allied Department tem nungi AHoDs aser HoDs tem dena liasü.

mangaoka ayutsü aser District Control Room/SDTF nem osang agütsütsü. Kasa mapang nung tangalen nung arurtem dang lokti nungi pilaa alitsü atema parnoki ajungshitsü aser SDTF nem takok tashi teyari agütsütsü.

Tanga state nungi arurtem shirnok district-i mait tsüngda ghonda 72 lia tashidak tendangba negative report bena malirtem anogo 10 kidang nungi mainshi amungtsü. Tashidak keta alirtem temang asadanger pei kidang/Covid Care Center/Covid Hospital nung amungtsü atema tetuyuba agütsütsü.

Tanga state nungi arur shirnok tashidak metendangi arudir parnok kidang/Paid quarantine/ Institutional quarantine nung anogo 10 amungtsü aser tashidak keta aliba temaitsü mesayura tashidak metendangi yoktsü.

Temalen shisema aliba tetuyuba sülen manidakertem ajak Disaster Management Act, 2005, Section-51 nungi 60 aser IPC Section-188 dak ajemdaker tapet temerenshi agütsütsü.

Kaketshir kumzuka ayutsü mera agütsüla: ANCSU

Dimapur, Rongchii/April 28 (TYO): Novel Corona Virus prokshia aoba azioktsü nükjidong nung ketdangsurtemi SOP balala benoka aliba nung kaketshir ajaki tazüokba lia anidaktsüla, ta All Nagaland College Students' Union (ANCSU) indang sangdong ka ajanga ashi.

State nung tashidak wara tali züina akumba mapang aser College tem nunga COVID-19 cases puteta aor asünung college ketdangsur dang tensa kanga junga asadangtsü aser kaketshirtem aser college nung inyakerkem kumzuka ayutsü

mera ajak agütsü ajungshir, ta ANCSU sangdong ajanga ashi.

Nagaland University ajanga tensa kanga junga asadanger tajungtiba nung tatidang agütsü asoshi sentongtem yanglutsü mepishir, ta sangdong ajangasa ashi.

State sorkari kaketshir ola angashiba atema pelar aser ano maneni bendanglen nungi arur atema SOP shidak amshitsü aser tang ama tensa mejungi aliba mapang school aser college tem den akokba nung yariteptsü mepishir, ta ANCSU ajangasa ashi.

Mon aser Tobu nung ki kar shibangtsü

Dimapur, Rongchii/April 28 (TYO): Covid-19 tashidak prokshia aoba nokdangtsü atema jenjang tapet agütsü asoshi DC Mon Thavaseelan K, IAS-i April 27 nü District Transport Office, Mon town, House No. 108, Tanlao Ward, Mon Town aser House No. 568 A. (Ground Floor), Wagiem Ward, Mon Town, ghonda 48 atema shibanga yutsüba osang metetdaksüogo.

Iba tetuyuba sülen tashi anga manidakertem Disaster Management Act 2005 Sections 51 nungi 60 aser Indian Penal Code Section 188 aser tanga temzüng ozüng

dak ajemdaker merenshitsü, ta DC-isa metetdaksü.

Kasa mapang nung EAC Tobu-i, Community Health Centre, Tobu aser Police Station, Tobu Town ghonda 48 atema shibangtsüba metetdaksüogo. Maneni M.H Store, Bazar 'B', Tobu aser B.K Pan Shop, Bazaar 'A', Tobu Town aser House no. 302, Bazaar 'A', Tobu Town, osang tejangja ka magütsü tashi shibanga atatsü tetuyuba agütsüba metetdaksüogo.

Tetuyuba sülen manidakertem ajak temzüng ozüng kübok tapet temerenshi agütsütsü, ta EAC-isa metetdaksüogo.

Dimapur nung ki kakpoka auya



Rasemnu anungdang Dimapur nung Signal Angami yimtak auri ki kakpoka auyaba tesem nung Forensic team purtem aruagi auertem tsungsu bushiba noksa nung angur. (Dimapur, April 28, 2021).

Dimapur, April 28 (TYO) : Tang Covid-19 tashidak wara agi amokmerenba mapang, ano Dimapur nungbo tebilemstü talila kaji auer poktetba ajanga anüngdanga ki shibanga yutsür nüngdak ao mesademi kümogo.

Tanü rasemnü (Bodbar) anüngdang anjungmeshi mapang ka nung, Signal Angami yimtak C Sector nung ki kibur nüngdaki orr kidang maliba mapang ka nung, auer arur ki kakpoka auyaa bener orr liasü. Mapang tatsüka tsüngda ki kibur kidangi meyipa arudang, par ki atsü kishi (main gate)-bo shitak shibanga liasü saka ki kishi (main door) kakpoka tur kidang nung jagi computer laptop tajung ka den cctv

machine dena agizüka bener oadoker liasü. Auer jagi kishi kapokba yin tajung ka toktsür orr liasü.

Iba auyaba osang ya agütsüli, Dimapur West aser Urban police station na prongla nungi police-tem arua auertemi ki kakpoka auyaba mapatemji repranga liasü. Ano, parnok den Forensic Team nungia ketdangsertema arua auer tsüngsü aputsü asoshi auertemi amdakba tesemtem tangoka bener ogo. Auyaba tesem ya Urban Police station kübok liasü.

Anogo ishika jakdanga kasa mepu nung auertemi gari tsüng aser gari battery auyaba osang liasü.

Arunachal: RGU scholars & kaketshirtemi longkak ait

Itanagar, Rongchii/April 28 (Agencies): Arunachal Pradesh yimtiba Itanagar nung amendaker aliba Rajiv Gandhi University (RGU) kaketshir aser scholars temi, parnok dang hostel azüngtettsü atema varsity ketdangsurtem tetuyuba agütsüba anema longkak ait.

RGU ketdangsurtemi varsity kaketshir aser scholar tem dang takaratiba nung hostel toktsür aotsü atema tetuyuba agütsüogo. COVID-19 tashidak prokshia aoba nokdangtsü nükjiding nung parnok iba jenjang agi. "Research scholar tem ya university nung tongtibang shilem ka ta onoki bilemer aser iba amala jenjang ka magi tsüngda ken o angatettepsü asü," ta Rajiv Gandhi University Research Scholars Forum-i, Varsity Registrar dangi züluba shiti nung shia lir.

"Onoki iba amala inyakyim ajak amokbanger inyaksangshiba magizüker," ta RGURSF-i ashi. Rajiv Gandhi University (RGU) ketdangsurtemi tawa course ajak atema offline class tem anena atatsü telemtetba agiba sangdongogo. RGU ketdangsurtemi, May 1 nü nungi tenzüka varsity nung offline class tem magitsü ta metetdaksü. Osang tejangka ka magitsü tashi iba inyakyim benoka atatsü.

RGU registrar Dr NT Rikam-i, COVID-19 tashidak tanaben poktetshia state nung tashidak menar tali akümba temulungdang yur offline class tem anena atatsü atema telemtetba agi, ta ashi. Registrar-i ashiba agi, university nung alirtem indang hall ajak shibangtsü aser item hall tem nung alirtem ajak May 1 nü mesera matongdang hostel toktsür aotsüla.

Kasa mapang nung paisa, class aser tatidang densema academic inyakyimtem ajak yanglushir aliba Academic Calendar 2020-21 (Dynamic Last Phase) dak ajemdaker online ajanga agitsü, ta metetdaksü.

Shillong, Tura, Jowai nung tenokdangba agütsütsü

Shillong, Rongchii/April 28 (Agencies): May 1 nü nungi tenzüka Meghlaya yimtiba Shillong aser Jowai o Tura jila nung tenokdangba tesashi agütsütsü, koba state sorkari ashiba agi, Covid19 tashidak menatepa aoba nokdangtsü atema lir.

Bodhbarnü Meghalaya chief minister Conrad K Sangma lenisüba nung senden ka amenba sülen deputy chief minister Prestone Tynsong-i iba osang sangdonga liasü.

"Deputy commissioner tem aser health department nungi mongintemi tetuyuba balala agütsüba dak ajemdaker onoki kanga junga sensak asem aser iba telemtetba agi," ta Tynsong-i ashi.

Tynsong-isa, Shillong Urban Agglomeration, Tura jila aser Jowai jila ya May 1 anepdang 5:00 ako nungi May 10 nü anepdang 5:00 ako tashi "containment areas" ama züngshitsü, ta ashi.

Pai ashiba agi, iba jila asem nung Covid19 tashidak kanga kara menatepa aotsü ana nung lir.

Sorkari tetuyuba agütsüba nung lokti tentet balala, yimden, tamangba yimsü dak sendakba

sentongtem aser tekülem agitsü memelar, ta Tynsong-i ashi.

Ajisüaka kiyimba benjung aser asüpila sentongbo agitsü melatsü saka covid dak sendakba nung tetuyuba agütsür aliba sülen tashi angaa anidaksüla.

Tashidak azüoktsü atema tenokdangba agütsür aliba mapang saisapong kecha asayatsü memelatsü.

Kasa mapang nung educational institutes tem ajak May 1 nü nungi shibanga atatsü, saka board tatidangtembo maneni agitsü. Jongdak maparen dak alaka district tem tsüngda senzisenpongtsü memelatsü.

Tongtiba masüba maparen atema senzisenpong memelatsü.

Tenüngdakba service agütsürtem dak alaka private office ajak shibanga atatsü.

Tenüngdakba service agütsüba sorkar department tema senzisenpongtsü atema temelaba agütsüogo.

Kisü jensü maparen akhi ama inyaksangshidaksütsü aser hardware dokan, electrical appliances, bank aser banking services, post office, aser telegraph, telecommunications amala mapatem tazüokba küboki maittsü.

Commercial garitem senzisenpongtsü melatsü, ajisüaka nisung pezü dak tali anir senzitsü memelatsü. Iba temelaba ya healthcare services aser nüburtem vaccine agi anir aotsü atema lir.

West Tripura DM-i tatok meshi

Agartala, Rongchii/April 28 (Agencies): West Tripura District Magistrate (DM) Shailesh Kumar Yadav-i, Agartala kübok wedding hall ka nung kiyimsang densema nisungtem kar dak teka sangshiba atema pa kanga mejungi aitsüba sülen anogo ka lir pai tatok meshiogo.

Pai, ni nisung kar temulung yirutsütsü atema bilema inyakba masü, ta ashi.

"Ni jenjang agiba ajak ya aonung curfew benoker aliba mapang liasü aser nüburtem ajangzüksü atema inyak. Ni nisung kar temulung yirutsütsü mesera maksüdaksütsü atema iba jenjang agiba masü," ta Yadav-i Agartala nung osangbenertem dang ashi.

Social media nung ayimsünga prokshia aoba video tem nung DM-i, kiyimba benjung nung dena alirtem dang o tamajung shia merenshiba nguogo.

Taoba Tripura CM aser CPI-M lenir Manik Sarkar-i, iba tatalokba ya tezüdangtsü ka aser District Magistrate kati iba amala jakla mebenshitsu asü, ta ashi.

"Kechi atalokogo, iba ya tezüdangtsüka. Iba amala timtem ya mataloktsü asü," ta Tripura MP aser BJP lenir Pratima Bhaumick-i ashi.

BJP MLA Sudip Roy Barman, Ashish Kumar Saha aser Sushanta Choudhury nungeri Tripura Chief Secretary Manoj Kumar dang DM mapa nungi agintsü khanga shiti ka zülüogo.

Kasa mapang nung Tripura Chief Minister Biplab Kumar Deb-i, Chief Secretary Manoj Kumar dang tatalokba indang report ka agütsütsü tetuyuba agütsüogo.

IAS officer sang ya kiyimba benjung ayongzükter aliba tesem kati ai aser COVID-19 dak sendakba nung tenokdangba agütsür aliba sülen manidakba atema parnok dang iba tesem toktsür aotsü ashi.

DM-i, kiyimsang aser par kinungertem nongtokba aser benjung jaoker kar dak tekong nung anüingba nguogo.

Ketdangsur, shiba police temi meiner arua liasü, pai kiyimba benjung nung adenertem ajak aputsü ozüing agütsü.

Sikkim Angh Ganga Prasad dak COVID-19 potet

Gangtok, Rongchii/April 28 (Agencies): Sikkim Angh Ganga Prasad dak COVID-19 tashidak potetogo. Pa dak iba tashidak Mongolbarnü nikongtsütsü menor poteta liasü.

Temetetsükaji Sikkim Angh Ganga Prasad-i taoba mapang COVID-19 vaccine dose anaprongla agiatoker liasü.

Temang nung tashidak keta aliba temaitsü terara sayuba sülen Sikkim Angh dak COVID-19 tashidak keta aliba potet.

Ganga Prasad-i, pa tema azüoka lir aser tang lokti nungi pila kidang mungdar ta metetdaksü.

Maneni Sikkim Angh-isa tawa pa den ajuruteper alir ajak dang tashidak tendangtsü atema mepeshia metetdaksüogo.

Ganga Prasad-i, "kü dak tashidak keta aliba temaitsü

terara sayua liasü aser tanü Covid-19 potetogo. Taoba anogo ishika tsüngda kü den ajuruteper alirtem ajak dang lokti nungi pilaa alitsü aser tashidak tendangtsü atema mepeshir. Kü tema azüoka lir aser doctor tem tawabangba kübok kidang lokti nungi pilar lir," ta ashi.

Ajisüaka Ganga Prasad kinungtsü aser Sikkim indang first lady - Kamala Prasad dakbo COVID-19 tashidak keta aliba mepotet.

Temetetsükaji Sikkim nung taoba hopta ana tsüngda COVID-19 tensa tamajungba kümogo.

Kasa mapang nung Sikkim sorkari sorkar office aser public sector undertakings (PSUs) tem ajak Bodhbarnü nungi tenzüka anogo asem (April 28 nungi April 30 tashi) shibanga atatsü tetuyuba agütsüogo.

GOVERNMENT OF NAGALAND

DIRECTORATE OF HIGHER EDUCATION

NAGALAND: KOHIMA

NO.HED/SCHO-1/2016/

Dated, Kma, the April 2021

NOTIFICATION ON POST MATRIC SCHOLARSHIP (PMS) FOR ST STUDENTS OF NAGALAND

It is hereby informed to all the beneficiaries of Post Matric Scholarship (PMS) for ST students of Nagaland that the Scheme Implementing Agency has started disbursing the 1st installment of PMS for the year 2020-21 since 15th April 2021 and accordingly uploaded the Beneficiary list and the Rejected list of PMS in the Directorate's website i.e. highereducation.nagaland.gov.in. Students whose names are in the beneficiary list and yet to receive their Scholarships can email/ whatsapp his/her Bank Account Details along with the Application ID/SI.No. in the beneficiary list to the contact/email given below.

Contact No. 9863379247

Email: query.hescholarship@gmail.com

Sd/-

Dr. APENI LOTH
DIRECTOR
HIGHER EDUCATION
NAGALAND: KOHIMA.

Issued by DIPR

GOVERNMENT OF NAGALAND

DIRECTORATE OF YOUTH RESOURCES AND SPORTS

NAGALAND: KOHIMA

NO.DYRS-SPORTS-KISCE(Manpower)/14/2020/ Dated, Kohima the April 2021.

Advertisement

Applications are invited to the following posts for Khelo India State Centre of Excellence (KISCE) at Indira Gandhi Stadium, Kohima for a period of 4(four) years under the Youth Resources and Sports Department, Nagaland, Kohima.

Sl.No.	Place of posting	Designation	Number of post	Salary
1	2	3	4	5
1.	KISCE, Kohima	Head Coach (Archery)	1	Rs.1,00,000-1,50,000/-p.m. As per SAI hiring norms
2.	KISCE, Kohima	Head Coach (Wrestling)	1	Rs.1,00,000-1,50,000/-p.m. As per SAI hiring norms
3.	KISCE, Kohima	Strength & Conditioning Expert	1	Rs.60,000-80,000/-p.m. As per SAI hiring norms

Eligible candidates may download details from the following link.

1. Nagaland.gov.in

2. dyrs.nagaland.gov.in /www.dyrs.com

Filled in forms may be submitted at KISCEKOHIMA@gmail.com on or before 15th of May 2021 at 4:00 p.m.

(AKUMLA CHUBA), NCS
DIRECTOR

Issued by DIPR



TIR YIMYIM

YIMOBILEM (EDITORIAL)

DIMAPUR YANGTEPNÜ, RONGCHII (APRIL) 29, 2021

Auer pokteter

Tang covid-19 tashidak wara tsübuba mapang ya ano tesem aika nung tetsübutsü aser tebilemstü mapa tuluka ataloka anguba aser angashibaji auer poktetba ya asütsü. Item auertem yagi anüngdang kibur maliba mapang yin temerang taju bener arua kishi kakpoka auyaa bener aoer. Tanü asüng auertem ya electronic osettem amshiba nunga mongin nisungtem lir, anungji parnoki sen aser senti oset hon aser taribi dang masü saka computer oset laptop aser mobile phone dena bener aoer. Ano, tejashitsü aser tezüdangtsükaji, parnok jak mepudaktsütsü asoshi CCTV enoka aliba kidangbo camera tama raksatsür aser cctv machine dena bener oadoker. Ano, auertemi kanga melaa auyabaji motor bike aser scooter-tem ya lir. Itemji dang masü saka tetsübutsü aser tarendaktsü kaji auertemi tantsür tambur kisüng aliba ki bushia aoer aser parnok kidang lia parnok meyong senotsü aser senti osettem bener aoer. Atangji, item auertem rongnung karbo police-temi putetter saka aika tsüngsüa mengutet ser amadoker. Aji oda, auer poktetba ya asenok asoshi tashidak wara poktetba tebilemstü dang nungi tuluba kümogo. Auer kanga alidakbo anüngdang kidang kibur liaka ki lapoka ayutsübaji tsübur, anungji kodanga ki lapoka mayur aser ki shibanga yur kimaleni aotsüa temulung agi matur. Iba tebilemstü akoktsü atema takokeribo aikati pei kidang aser kima cctv enoka ayur saka auertemi itemji dena agizüka bener oadokba agi cctv-a kecha nungdak mali amato ka kümadokogo. Atangji, auer poktetba ya asen lima nung dang masü saka alima tesem ajaklen lir, ajisüaka asen lima nungbo akhidang dang nungi tangsa taoyaba auyar. Ibaji Covid-19 tashidak wara poktetter külen mapaa maka aser tachi-tajemtsüa maka ta akümba agi nisung aika auer küma aoer asü (?) mesüra mapa meinyaknüba agi auyaa chiyonga alitsü meranger (?) ta bilemdanga iba tebilemstü angatetsü kanga tongtibang kümogo. Ibai kija kibong ka tebilemstü masü saka yimkong tebilemstü lir, anungji talisa town nungbo kiyong aser mepu shia nung yimteni auer nokdangtsü asoshi tapet sentong yanglua inyaktsü kanga nungdak adoker. Aji oda, auer kanga alidakbo kiyongertem rongnung temulung tenla sarua kima yimdong nung ajanga süirtem ajak tangoka yutettsüsa cctv enoka ayutsüa akok. Yimtak yimtsüng nungbo akhidang nungi yimteni anogo shia nisung melentepa tzüdenmong mongdaksür aser item tzüdenmongertem jagi anüngdang yimer mapai oseper külen mi lendong aser auer ashir mapa tamajung nungi yim kümzüka ayutsü asoshi mita amonger. Iba kasaji, town nunga kiyong shia yimteni anogo shia nisung melentepa anüngdang mitkar inyadaktsütsü akok. Iba mitba mapa yabo anüngdang nungdak, kechiyong aonungbo nisung ajak pei kidang alir. Ano, tanü asüng town nung balaka, auertemi sademsadema ki kakpoka awazübaji, ki aika yimdonglen nungi shingaia mangutsüsa longru (bricks) agi atsü talanglang atsübanger merang kishi tulu aser talang agi shibanga ayur, anungji kimalen nungi ki kima aser kilong nung nisung senzüba aser awazübaji shingaia mangur. Asenokibo nisung tamajunger nungi asen taküm aser rongsen kümzüksü asoshi kimalen nungi shingaia mangutsüsa atsü talang aser tuluji yanglur, saka tanü asüngbo iba amaji shingaia mangutsüsa ki longbanga atsü talang atsübaji asen asoshiang lendong tuluba kümogo, anungji itemji khen bilemdangtsüla. Aji oda, akok tashi shiruru maitra aser arrtsü metetra ojang ta bilema, atangji akok tashi topur junga yanglutsü saka atsüji kima aser telong nungia angutsüsa tapok keta yanglura, iba jagi auertem awazütsü mesademi kümduktsütsü. Atangji, shiba südir sang, auyabaji auyanüseta auyar masü saka maka aser mechiyong marem tsübuseta aser shisaboluseta auyar, anungji iba tebilemstü ya arogo aser lokti tentetemi tangatetba aser teyari tajung agüja akoktsü merangtsüla. Kasa mapang nung yimtenia mitkartem mapa akangshidaktsüba dang masü saka iba ama lokti nükenbelemstüsa adokba tebilemstü kulitem ya bushia, sensosangertem rongnung shinga ashir auer mekümi pei taküm aser kibong agi peisasa nümadangteta liettsüsa akok tashi tangatetba agüja lenmang tamajung nungi anitetsüla. Aji oda, tanü putu nungbo yimten ya ozüng raksar merenshiba yimten dang masü saka ozüng raksartem nisung tajung kümduktsütsü merangba yimten asütsü nungdaker.

OLEMSABANG

Nabot lung agi onseta südaktsüba ama Delhi nung aluyimeri ajurur

- Wati Longchar, Serampore

(Yashi adok nungi...)

Nabot jenjang

Tanü aluyimer jenjang

Nabot – aluyimer, alu nungi züsentedba dak dang taküm metaloker alir, sensaker, teyariner mali, telok balalai, yimeria sünga, pa asoshi ochi kuli magütsütet	Aluyimer shirnok ali maka, tangar lu yima senzür, mesüra hectare ana tekübok aliba aluyimer. Hachira oa chiyunga aliba pur, shingaia mezüngokba telok den medemangtsü akok
Ahab – Merumeru yimsüsür, Tsüngrem ama nüburtem nem külemdaktsünüba nisung. Pai kechi inyaker yamaji nübur madak tashi amshir. Nübur hau ta züngoka mali.	Cooperate – Company tulu, rongsen ajak parnok ket nung azüoka ayutsü tashi lir. Tajangzük tajangzük dang bushiba telok den medemangtsü akok.
Yazebel – Auüyatsü, tashiyim inyaktsü ajungshir. Rongsen asoshi tiyazü mapa inyaktsü metsübur, sensaker tepsettsü metsübur.	Corrupt officials – Kolem kiraka amtsü ajungshibatem. Lokti atema masü, pei asoshi bilemba tulerem. Nübur tepsettsü metsübuba tuler den medemangtsü akok
Yimti tamburtem – yimtsüng nung lenirtem shirnoki ochi kuli mesütet. Tuler tsübua bilemterem.	Arogo, yimtsüng lenirtem – Ochi nung tasü maiter. Sensaker aser aluyimer asoshi ochi ola madokba den medemangtsü akok. Tuler külemertem
Samesa nisung ana – tashiyim inyaka aliba nisung. Makamaiter memeimer. Tsüngrem metsübur. Sen yong nisung tepseter.	Ochimashiba police, doctor, NGO lenir, lawyer, pastor/toklang tenzüker, nüchiso bushir shirnoki pei tajangzük k asaa nübur ashiojka yutsüba den medemangtsü akok
Tamarenertem – chuba langbang meküta amener chuba yarirtem, ozüng yanglurtem. Nübur nungdak masü, takar atsünga obendang agütsürtem.	Ochimashi bangdak yimsüsür – Tashi azüoka ayutsü atema nüburtem rongnung telemsa adokdaksüba. Aluyimer nungdak masü, saka Cooperate nungdak atema noktakba den medemangtsü akok.
Yimti nung alirtem – tiyazü asü ochi kecha masadangi tuler/yimsüsür o angaba.	Public – Fake news nung amangba aser election nung meyongnem yoka achir yimsüsür anema ola madokteü aliba pur den medemangtsü akok.

Shiba asoshi arogo noktaksü ?

Nabot kümzüksü asoshi ochi ola adoktsü asü masü? Ochimashi yimsüsür anema noktaksü asü, ola madoki alitsü? Samesa nisung anema ochi ola adoktsü asü madoktsü? Aluyimer phu akümtsü asü, Cooperate phu akümtsü? Parliament nung ozüng asem yangluba jagi aluyimer ajungkettsü asü, tali sensakba tiai yoktsü? Nabot otsü ajanga arogo dang shiba atema noktaksü, ola adoktsü, lungjemtsü aji tejangja sayur. Ozüng aser inyakyim kobala ajanga nüburtem tashiyim agi arakmoka ayur, tiyazü küli nung tepseter, nüchiba munguteti alar tiai yoker iba anemaji noktaksüla. Ainkar Elija Ahab dangi oa, Hoi, tepseter! nai tangar meyong agi nungji Nabot zü koba azüi menak iba azü jagi ne züa menaktsü ta KIBUBAi ashir (1 Chuba 21:20). Hoi, na nungi jakzükba tebur chanu ajak leptokadoktsü. Yimti nung alirtem, tamburtem, tamarener, samesa nisung, shirnoki ochi kuli mesütet, parnok alar süaka, nüchi süaka ajak samatsütsü. Aser Yezebeli KIBUBA tsüngdang kechi tamajung lir aji ajungmesoa inyak nung "Yezeel jara kübok azütemi Yezebel achitsü." Aser nüburtem 'shiba Ahab yimti nung südir azütemi achitsü aser shiba alu nung südir anung ozütemi achitsü' ta ashi aser yamaji atalok.

Nabot atema asü, BigBoss atema terenlok

Hau, terenlok nungdak, nüburtem tejakleni odaktsüba mapatem nungdaker. Ibalat terenlok inyaktsü lungjemtsüla. Saka Ahab mesüra Yosef nungeri inyakba ama sensaker ashiojka industrialist kar noklang nung 90% akatsü, aser ali, mopung, tzü ajak menenja sen aser tajangzük dak rangdaker inyakba terenlok mapa nungdak mali. Alii meimchir peri madoktsütetsüsa, mopung tamajung achiba tashitak ajanga asütsüsa akümba, tzü alia ajemtsüsa akümba, shiruru melitetsüsa kümduktsüba terenlok menungdaker. Iba lima ya tanü asen meyong lima dang masü, tarutsü lanur asoshi awzüka yutetba terenlok nungdak.

Terenlok asoshi noktaker yamai ashitsü:

- o Nüburtem atema terenlok nungdak and ozü Governmenti terenlok asoshi inyaktsü ta ashitsü.
- o Industry balala lapoka aoba ajanga nüburtem aser alima tejakleni odaktsütsü
- o Tarutsü lanurtem atema Governmenti terenlok mapa inyaktsü
- o Terenlok mapa balala aika bener aru nung dang lanurtem mapa ngutetsü
- o Nüburtem taliba jenjang tajungba kümduktsütsü asoshi industry nungdak
- o Ali mapayui ayoktsüla, agütsütsüla. Governmenti sen dalang agütsütsü
- o Terenlok mapa ajanga dang makamait tia nungi anitetsü
- o Terenlok mapa makara nüburtem sensak tia nung dang alitsü
- o Nübur shirnoki industry anemer parnokji tangar dak metaloker alitsü
- o Industry ajanga dang sen züina kümduktsütsü aser nüburtem anisüngzüka alitsü
- o Sen aka nung dang tanurtem school tajung nung züngduktsütsü akoktsü
- o Light, lenmang, internet, hospital a.a. tajungba akümtsü
- o Nüburtem anüi pua, tzünglui aja mapa inyakba anentsü aser taküm taliba jenjang tajungba akümtsü, arishia talangba akümtsü
- o Terenlok asoshi noktakang
- o Europe, USA, China, a.a. terenlok mapa balala inyaka aoba ajanga alimai akhüm keta repranger.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Caritas Indonesia-i cyclone agi kongshirtem asoshi ki sütsütsü



Indonesia nung 'Seroja' cyclone lendong atalokba sülen iba yipru agi kongshirtem yaritsü atema East Nusa Tenggara province nung aliba Larantuka Arogo nung renemshiba noksa nung angur.

April 28, 2021: Khristan telok-Caritas Indonesia (Karina)-i tawa anüdoklen aliba province nung yipru mopung tesashi agi kongshirtem nem ki sütsütsü, ta sangdongogo.

'Seroja' ta ajaba yipru mopung tesashi ajanga anentsüh aser tzümet süng lendong nung nisung 180 dak tema süogo.

April 5, 2021 nü Cyclone Seroja agi East Nusa Tenggara province kongshiba lendong nung nisung 181 asü, nisung aika yiru aser ki meyrjang aika raksatsüba sülen Catholic Arogo kübok Caritas Indonesia-i iba lendong agi kongshir meyrjang aika yaria arudar.

Iba lendong mapang samaba nisung 47 bo tang tashi mangur.

Caritas Indonesia (Karina) Director, purit Fredy Rante Taruk-i, "Sorkari teyari agütsüba

maparen May 5 nü anentsü, anungji Karina-i Larantuka Arogo kübok Caritas den senteper maneni teyari agütsütsü aser iba lendong agi kongshirtem nem ki sütsütsü," ta metetdaksü.

Paisa, Karina aser Larantuka Arogo kübok Caritas nati senotsü teyari agütsüba den külemi shisaliok aser counseling agütsütsü, ta metetdaksü.

"Senotsü teyari agütsüba ajanga parnoki ki oset balala alitetsü aser kisüdang amshiba hadir aser tanga nüngdak balala alitetsü," ta purtiri metetdaksü.

Pai ashiba agi, Karina-i kibong shia nem US sen 70 agütsütsü aser tanga telok balala den senteper küm piyong teyari balala agütsütsü.

Onoki chiyungtsü den tanga oset balala agütsüdar, ta pai

ashi. Pai ashiba agi, iba lendong agi kongshirtem atema Adonara asetkong aser Lembata asetkong na nung ki timba sütsütsü, kechiyong iba lendong agi asetkong ana ya tamajungba kongshi.

Iba lendong nung asürtem 181 nungjagi Adonara asetong nung nisung 72 aser Lembata asetkong nung nisung 67 astüba densema lir.

Karina Director-i ki kwi sütsütsüar ibajibo memetetdaksü saka iba lendong nung ki meshimeshia samartem mesüra ki mejungi raksaa alirtem nem ki sütsütsü, ta ashi.

Iba dak alia Indonesia nung Khristan telok- Sant'Egidio-ia Malaka district nung iba lendong agi kongshirtem yaria arudar.

Kaduna nung Arogo ka amak; nisung ana tepset aser pezü puer ao

April 28, 2021: Amongnü anepdang (April 25) kiralongrartemi Kaduna State kübok Manini yimadak aliba Haske Baptist Arogo amakdang nisung ana tepset aser nisung pezü puer ao.

Christian Association of Nigeria (CAN)-i sangdong ka ajanga, "Tanü, April 25, 2021 nü tai maket tamangertem Tsüngrem külemtsü aser sarasademtsü atema Tenla kidangi ao, saka parnok amak. Iba lendong nung medical doctor ka densema nisung ana asü, Arogo züngsem aika yiru

aser kar puer ao," ta metetdaksü.

"Tamangba yimsü ajak sadoka amangtsü temelaba agüja aliba linük ka (Nigeria) nung ya ataloker," ta CAN-i metetdaksü.

Kaduna state nung Khristantem anema maneni inyaker. Muslim nütsüng timba aliba area dang ya "middle belt" ta ajar, aser iba tesem nung Khristantem kanga reshikngshir.

Tesüiba küm ishika tsüngda Kaduna State nung Khristantem aika puer ogo,

aika reshikangshi aser aika tepsetogo.

"Pua aliba Khristantem ajak meyipa arutetsü atema sarasademjang, Nigeria nung asen adianutem ajak atema sarasademjang, Nigeria nung Arogo tashi itdakjang aser reshikangshi tia nung aliba Tsüngrem chirtem anepjang ta s a r a s a d e m j a n g . Mamangertema temelung meyiptsü aser Khrista ajanga tekümtet angutsü atema sarasademjang," ta International Christian Concern (ICC)-i mepishia metetdaksü.

Lebanon nung Khristantem atema tejenokdak makai kümogo

April 28, 2021: Lebanon linük nung sorkar ochimashi, rongsenkettsüng jenjang majungba aser yaküm Beirut nung 'ammonium nitrate' apokba lendong densema lendong balala ajanga linük tarutsü tia mejangjai kümogo, iba denji külemi iba linük nung Khristantem talidak mesüra tejenokdak makatsüsa tensa ka nung lir, ta ICC osang ajanga metetdaksü.

Lebanon linük nung nütsüng shilem 40 jungnüabo Khristantem lir, kechiyong Middle East tesem balala nungi jenshiba Khristan aika iba linük nung jenoka lir.

Tang Lebanon nunger rongsenkettsüng jenjang ano tamajungba akümba den külemi international banks aika anener.

2020 küm August ita nung Beirut nung lendong atalokba sülen nungi tenzüka

Khristantemi iba linük toktsür aotsü meranger.

Advocacy group- IDC-i ashiba agi, tang iba linük nung nütsüng shilem 60 bo kanga sensak tia (below the poverty line) nung lir. Temeket aliba linük balala nungi reshikangshi ajanga Khristan aikati Lebanon nung jenoker, ajisüaka tang iba linük lenla ajak nung jenjang mejungi akümba agi Khristantemi shisabulur.

ANOGO ABEN TSÜNGREM DEN

Pei sasa azüokba

"Shibai pei tanela mazüokteter, pa teraksa aser jara maketba yimti ka mesük." A. Shin 25:28

Tanela süngjangji tepela, temeim, taremsük, kümlü tajung, tesünep, tejungnü, ajemaluba, temulung lemtetba, pei sasa azüokba. Tanela süngjang asen tuluba Tsüngremi agütsüba sempet mazüoktetra, mamshitetra koda? Kechi ka asütsü amai bilemer. Mazüoktetba mapaji tejashi, tesembatep, ain adokba, rongnung, pei sasa tulu bilemba, ochi mashi. Tanü nai koba shimmer. Asen lima lokti nungi anir kibong, Arogo, taküm tanela tazüokba aliba jagi tepela, yimjung aser temeimtep agi Kotak lima ama alitsü nükla. Tazüokba ka makai kecha inyaktsü makok lima ama alitsü nükla. Tazüokba ka makai kecha inyaktsü makok. Pei-i akoker, pei-i inyakteter ta dang jajar idakji lendong lir. Saka tanep lesson nung Tsüngrem O-i ashiba ama teraksa yimti masü saka Tsüngremer tawabangba nung temoatsü süa Tsüngremi mulungba tanela sempetji agüzükra koda jangratemtsü.

Sarasadem

Tanela tazüokba kateter taküm ka asütsüsa Kibubai nai ni aniangma. Amen

Sri Lanka nung Tenla ki amakba ken o nung Muslim nunger lenir ka apu

Colombo, April 28 (Agencies): 2019 küm Easter Sunday nü Sri Lanka nung bomb amshia Tenla ki ana den hotels amakba ken o dak sendakba ken o nung Sri Lanka police-i Muslim nunger tongti lenir ka puogo; küm ana tejaklen iba lendong nung nisung 279 pokseta liasü.

Iba lendong atalokba sülen mapang shia Khristantemi sorkar dang iba ken o tekaraba nung bushisüngdangtsü takhangba agüja arur.

Taoba Honibarnü iba ken o dak sendakba nung Sri Lanka Police-i All Ceylon Makkal Party (ACMP) lenir aser taoba mapang Minister, Rishad Bathiudeen pua tang Prevention of Terrorism Act (PTA) kübok police ket nung lir, ta police otongdar, Ajith Rohana-i metetdaksü.

April 24, 2021 anepdang Sri Lanka yimtiba, Colombo nung police-i mita aodang Bathiudeen aser par adianu, Riyaaj na apu.

"Taküm tenla agüja bomb lendong agütsürtem den tesendaktep aliba scientific kuli nung ajemdaker PTA ozüng kübok tena apu," ta police otongdarisa metetdaksü.

Tena atema ken o jembitsür lawyer katibo, presidential inquiry ajangabo tena anema kuli kecha mangu, ajisüaka yimtenren tsütsü mangyangtsü

atema tena puogo, ta aitsü. Taoba hopta tetenzüklen Sri Lanka nung Roman Catholic Arogo nung tongti putir, Cardinal Malcolm Ranjith-i, iba ken o bushisüngdangba tsütsü sorkari timtem agütsür, ta aija liasü.

2019 küm Easter Sunday nü iba lendong atalokba sülen anogo ishika tsüngda nisung 200 jungnüa pua liasü, ajisüaka iba ken o nung tang tashi nungbo shinga aija mali.

Taoba Bodhbarnü Ranjith-i, iba ken o bushisüngdangba tsütsü terenlok kecha mali, ta shia sorkar dang iba tatalokba tekaraba nung bushisüngdangtsü takhangba agüja liasü.

Easter anogo nung bomb amshia amakba tatalokba sülen küm ana ajungba anogomong taoba hopta amongdang Ranjith-i, sorkari iba tatalokba junga bushisüngdangba masüba agi ni kanga mepelar, ta metetdakja liasü.

Colombo nung iba tatalokba bilemtetba den külemi asürtem nem akhüm agüja amongba sentong nung jembidang pai, "Iba ken o junga bushisüngdang masüba ajanga shingaiya iba ya mezüngshiba kuli sayur," ta shia pai sorkar dang, tekaraba nung aibelenertem pua temerenshi agütsütsüla, ta takhangba agüja liasü.

OLONG PAITEP # 5796


1		2				3		4		5
				6						
	7		8							
9					10			11	12	
			13			14	15			
16					17			18		
				19		20				
21		22								23
24										
						25				

TIPILEN		LANGSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. _ _ _ tatsü	- (3)
24. Tenüng kasa jatepba	- (7)	12. Tebur kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 5795 TELANGZÜBA

TIPILEN :	LANGSÜNGLEN :
2. Anükalem, 4. Mesak, 5. Apet,	1. Kündang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.

Noksa nung meputepi aliba 10 bushiang



TANÜBO NAI LANGZÜANG

Q. International Space Station ya _____ küm lapoka liasü.
 A.1992 B.1996 C.1994 D.1998
 _____ (Taruba adok nung onoki langzüsü)
YASHI ADOK TELANGZÜBA : 2015

AO OSHI ANGAZÜKDAK:

TANÜ ANGAZÜKTSÜBA OJANG

Tajem
 (adj) makong, maro (fresh, not dry)
 * Süng tajem nung mi mejangrur.

Chija
 (adj) süng tajema masü, taroa masü (half dried wood)
 * Chija süng atsükdang mokoziü kanga adoker.



NAI-A YA METETTER MA?

NEW ZEALAND TEAM AJUNGAI "MAN OF THE MATCH" AWARD ANGU

Cricket ya telok longjemer asayaba saisapong ka ta ajaki jangjaa lir, saka iba asaya/asayamung nung asayar tajungtiba nem 'Man of the Match' aser 'Man of the Series' naroküm agütsür; aser tanü tashi iba yimya amshia arudar. Ajisüaka, tesüiba küm 24 tejakdang 1996 küm April 3 nü Carriibbean nung New Zealand aser West Indies na tsüngda ODI series pungo nungi pezübuba asayaba mapang Kiwis puri iba asaya run 4 agi takok angu. Iba takok den külemi New Zealand team pur ajunga nem 'Man of the Match' award agütsü. Iba 50 overs asaya nung West Indies-i toss koka bowling asütsü shim, kong New Zealand-i over 35.5 nung run 158 dang yanglur asayar ajak out süadok. Terepranger aikati iba asaya New Zealand-i makoktsü ta imlaa liasü. Tanabuba innings nung Indies puri over 49.1 tashi noktak, saka parnoki run 154 dang yanglutet aser asayar ajak out asü. New Zealand puri kanga dang junga asayaba ajanga asayamung ayongertemi team ajunga nem 'Man of the Match' agütsütsü lemtet.

* **Iba asaya nung 'Man of the Match' angurtem :**

Dipak Patel	Craig Spearman	Roger Twose
Lee Germon	Gavin Larsen	Stephen Fleming
Justin Vaughan	Chris Harris	Shane Thomson
Chris Cairns	Nathan Astle	

SUDOKU # 5839

			1	3	9									
1		6		8	4			7	5	2	8	1	7	6
		3			6	1	5		7	9	1	3	2	4
2	9	3	6		8			4	9	8	7	6	1	3
4			8	7				3	6	3	5	8	4	2
				4	2	7		5	2	1	4	7	5	9
5	9					6	8		4	7	9	2	6	1
7		1			8	5	4		8	5	3	4	9	7
6		4	2		3	9			1	6	2	5	3	8

TELANGZÜBA # 5840

			3	4	6	9	8	5	2	7	1
1		6		8	4			7	5	2	8
		3			6	1	5		7	9	1
2	9	3	6		8			4	9	8	7
4			8	7				3	6	3	5
				4	2	7		5	2	1	4
5	9					6	8		4	7	9
7		1			8	5	4		8	5	3
6		4	2		3	9			1	6	2

OJANG LUTEP # 5382

EONGNKÜYI	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
EMBBILA	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
JAABKO	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MSAKKTOÜ	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
MAAP	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
RBKAO	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
PMAAGN	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
AANGGI	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
AKKOT	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>
AUNGR	:	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>	<input type="checkbox"/>

OJANG LUTEP TELANGZÜBA # 5381

**TELOKTESEN NUNG MAKSÜ MESÜRA NÜNGSEN
 MENATSÜ METSÜBUI JEMBIDANG TAKOKSA AJURU**

TAN HOPTA ATEMA - KOMA SÜLA ?

Q. Covid-19 tashidak wara agi senzüsenpong aser lokti senden senteptsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzük nunga koma süla ?

Tanü West Bengal election shilem 8buba agia election tembanger



April 29, 2021 nü West Bengal nung election shilem 8buba (tatembangbuba) agitsü lia Brihostibarnü Birbhum district nung polling officials-i EVM aser tanga osettem reprangshiba noksa nung angur.

New Delhi, April 28 (Agencies): Brihostibarnü West Bengal nung assembly elections shilem 8buba agia election tembangtsü; tang state nung coronavirus kanga prokdar, anungji covid anema tetuyuba balala shidak benshia election agitsü.

Election tatembangbuba anogo nung assembly menden 35 atema election agitsü, aser iba election nung vote agütsütsü temsüa alir lakh 84 lir. Iba election nung cendidate 283-i tokteper. Murshidabad, Birbhum, Malda aser Kolkata district tem kübok polling station 11,860 nung election agitsü.

TMC nungi minister ana - Shashi Panja aser Sadhan Pandey nati Shyampukur aser Maniktala menden na nungi tokteptsü. Menden 35 nungjagi Malda aser Murshidabad districts kübok menden 17 nungbo telok asem- TMC, BJP aser Left-Congress-ISF teloktep kanga atongtepa tokteptsü, ajisüaka item

menden nung Left-Congress-ISF teloktep jenjang tera tajungba lir.

Tamalen agiba elections nung rara kanga adokba nung ajemdaker security kanga akangshio; talisa April 10 nü election shilem pezübuba agidang Cooch Behar nungbo nisung pongu khaset.

Election tesünep nung kanga junga agitettsü atema Election Commission-i April 29 nü election atemabo central sepai company 641 lemzüksüogo.

Mongolbarnü West Bengal nung nisung 16,403 dak coronavirus puteta liasü aser tang tashi nungbo state nung nisung ajak agi 7,76,345 dak iba tashidak putetogo, ta state health department-i metetdaksü. State nung iba tashidak agi nisung ajak agi 11,082 süogo.

Brihostibar election nung TMC nungi tongti candidate ji Birbhum district nung TMC Tir, Anubrata Mondal asütsü.

Coronavirus kanga prokba nung ajemdaker West Bengal

nung election shilem 5buba nungibo election nüboyim lokti senden tulu magiteti liasü. Wara prokba nokdangtsü atema election commission-i state nung road shows aser gari rallies nokdang aser lokti senden nung nisung 500 dak tema adenshiba nokdang.

State nung iba tashidak kanga prokba atema TMC tongti lenir aser chief minister, Mamata Banerjee-i BJP aitsüba den külemi Centre sorkari Covid wara tanaben prokba menokdangteter aser state nem vaccine peria magütsür, ta aitsü.

Brihostibarnü election tembangba sülenbo ajaki exit polls nung rangloksü.

Tang tashi nung opinion poll balala ajangabo TMC-i takok angutsü, ta asadangtetogo.

West Bengal nung dang masü saka Tamil Nadu, Kerala, Assam aser Puducherry assembly elections indanga exit polls sangdongtsü aser May 2 nü vote zünga election osang sangdongtsü.

May ita nung anogo 12 bank tem shibangtsü

New Delhi, Rongchii/April 28 (Agencies): Taruba May ita nungbo India tesem ajungalen anogo 12 tashi public aser private sector banks shibangtsü; item anogo rongnung Honibar aser Amongnü anogotem densema lir.

May 14 nü Eid-UI-Fitra benjung anogo nunga state timbaka nung bank tem shibangtsü. Bank temisa May 1, May 7, May 13, May 14 aser May 26 anogotem nung bank shibangtsü, kechiyong item anogo nung Labour Day, Jumat-ul-Vida, Id-UI-Fitr, Akshaya Tritiya aser Buddha Pournima tenjitsü. Ajisüaka state sasep nung sodi anogotemji balala asünungji state ajak nungbo anogo pongu nungji bank tem meshibangtsü.


Bank sodi anogotemji: May 1 - Maharashtra Din/May Day (Labour Day), May 7- Jumat-ul-Vida, May 13- Ramzan-Id (Id-UI-Fitr) (Shawal-1), May 14- Bhagvan Shree Parshuram Jayanti/Ramjan-Eid (Eid-UI-Fitra)/Basava Jayanti/Akshaya Tritiya, May 26- Buddha

Pournima. May 1,7,13,14 aser 26 anogotem nung bank lapokba yimti/states ji ; May 1 nü Agartala, Ahmedabad, Aizwal, Bhopal, Bhubaneshwar, Chandigarh, Dehradun, Gangtok, Jaipur, Jammu, Kanpur, Lucknow, New Delhi, Raipur, Ranchi, Shillong, Shimla aser Srinagar nung banks lapoktsü.

May 7 nü Jammu aser Shimla na dak alaka tanga states ajak nung bank lapoktsü. May 13 nü Belapur, Jammu, Kochi, Mumbai, Nagpur, Srinagar aser Thiruvananthapuram dak alaka tanga nungbo banks lapoktsü.

May 14 nü Belapur, Jammu, Kochi, Mumbai, Nagpur, Srinagar aser Thiruvananthapuram dak alaka tanungba tesemtem nung bank lapoktsü.

May 26 nü Ahmedabad, Aizwal, Bengaluru, Bhubaneshwar, Chennai, Gangtok, Guwahati, Hyderabad, Imphal, Jaipur, Kochi, Panaji, Patna, Shillong aser Thiruvananthapuram nung bank lapoktsü.



Bhopal, April 28, 2021: Bodhbarnü Bokaro nungi Oxygen Express train ajanga Mandideep Railway Station, Bhopal tonga Liquid Oxygen bener aruba noksa nung angur.

India nung Covid agi asür lakh 2 jungogo; teshirangdakpur lakh 25 lir

New Delhi, April 28 (Agencies): India nung tesüiba ghonda 24 tsüingda coronavirus tashidak agi shiranger 3,000 dak tema asüba densemabo tang tashi nung linük nung iba tashidak agi asür lakh 2 jungogo, ta Bodhbarnep Union Health Ministry-i metetdaksü.

Tesüiba ghonda 24 tsüingda ano nisung lakh 3.6 dak

coronavirus putet aser tang tashi nung linük nung coronavirus caseload million 18 jungogo.

India nung ano nisung 3,293 coronavirus tashidak agi asü aser tang tashi nung iba tashidak agi asür ajak agibo 201,187 jungogo, ta health ministry data ajanga metetdaksü.

Tesüiba ghonda 24 tsüingda

linük nung ano nisung 3,60,960 dak coronavirus putet aser tang iba tashidak agi teshirangdakpur lakh 25 jungogo.

Bodhbarnü Indian Council of Medical Research-i ashiba agi, Mongolbar tashi nung linük nung samples ajak agi 28,27,03,789 tendangogo aser iba nungji April 27 nü samples 17,23,912 tendangba densema lir.

Delhi nung NCT Act mapa küma benoker

New Delhi, April 28 (Agencies): Delhi nung Government of NCT of Delhi (Amendment) Act, 2021 mapa küma benokogo aser tang nungibo Delhi nung sorkar tetezü Lieutenant Governor (LG) lir, ta osang ka ajanga metetdaksü.

Bodhbarnü Ministry of Home Affairs-i ashiba agi, Centre sorkari April 27 nungi Government of National Capital Territory of Delhi (Amendment) Act, 2021 mapa küma benoktsü atema telemetba agia liasü.

Taküm March 18 nü linük Tir, Ram Nath Kovind-i NCT of Delhi (Amendment) Act, 2021 agizüka liasü aser iba ozüng kübok Delhi nung "sorkar" tetezü "Lieutenant Governor" lir aser yimti nung sorkari telemetba agitsü atema L-G den tema jembitsüla.

Ministry of Home Affairs additional secretary, Govind

Mohan-i sangdong ka ajanga, "Government of National Capital Territory of Delhi (Amendment) Act 2021 (15 of 2021) nung section 1 kübok subsection (2) nung agüja aliba tashi nung ajemdaker Centre sorkari iba Act benoktsü atema April 27, 2021 anogo shimogo," ta metetdaksü.

Lok Sabha nung March 22 nü iba bill agizüka liasü aser March 24 nü Rajya Sabha nunga iba bill agizüka liasü.

Parliament nung iba bill agizükba anogo nung Delhi Chief Minister, Arvind Kejriwal-i, 'iba anogo ya India nunger democracy atema tejashitsü anogo ka lir,' ta jembia liasü.

Parliament nung iba bill benokba mapang Kejriwal-i, nüburtemi shimtetba Delhi sorkar tashi ajak agientsü atema BJP-i inyaker, ta aija liasü.



April 28, 2021 nü Bhopal nung Madhya Pradesh police-i PPE kits semer coronavirus tashidak agi asür Police Sub-Inspector, Mohan Singh Patel nem akhüm agütsüba noksa nung angur.



Phnom Penh, Cambodia tezulen mozü agiba tesem ka nung yimdaklirtem Sinopharm COVID-19 mozü dose tanabuba agitsü atatepba mapang tangokba noksa ka yangi angur. COVID-19 cases kanga sashia akumba ajanga Cambodia nung tawa ang capital region shibang aser yangji sorkari nüburttem dang chiyongtsü alitsü atema ki yutsür mao tajungba, ta ashiba sülen nüburttem nem chiyongtsü ki tonga bener arua agütsüsü atema online store tem lapoka lir.

Pakistan nung COVID wara tenzüker anogo tamajungtiba ajuru

Islamabad, Rongchii/April 28 (Agencies): Pakistan nung tesüiba ghonda 24 tsungta COVID-19 agi nisung 200 dak tema süogo, aser taoba küm iba wara tenzükerba sülen linük nung ibaji anogo tamajungtiba alitsü ta ashir, kong ketdangsürtemi tenokdangba tasen benoktsü asadanga mapang lir.

Bodhbarnü nisung 201 süogo ta ketdangsürtemi ashir, anungji National Command and Operations Centre (NCOC) ajanga data bendenba nungi linük nung COVID-19 agi asür nisung 17,530 ajunger.

Coronavirus cases tasen 5,292 liasü, aser active cases 413 agi timba kuma 88,207 lir, ta data nung sayur.

Pakistan nung March ita tetenzüklen nungi COVID-19 cases tali kuma timtema arur, kong anogoshi cases 2,000 dak tema putetyonga arur.

Iba linük nung World Health Organization ajanga latetba dang tajemba nung tendanger, aser Mongulbarnü nisung 49,101 dak tendangba nung positive

rate ya shilem 10.77 liasü.

February ita nungi tenzüker iba linük nung COVID-19 agi nisung asüba timba akumer. April ita nisung tajemba agi 3,000 asü, koba tashidak wara tenzüker COVID-19 agi asüba shilem 17 alitsü.

Business aser shishilempaba tesem lapokba nung sorkari ozüing benoka aliba aser ano social distancing yimya aser mürekmejuba mapa metsüngaretta amshitsü mechi sorkari yimti tulu 16 nung hopta tetenzüklen mitkartem yoka liasü.

Iba virus tali putetba yimtittem nung sorkari mera tesashi agir aser May ita tiyonglen Muslim nunger benjong, Eid al-Fitr mapang senzüsempogba aser business tem nung tenokdangba agütsüogo.

Secondary school tem nung tatidang agitsü renema liasü, saka kaketsahir aser tsüraburtemi ola adokba sülen linük tesem ajunga nung tatidang ya June 15 tashi magitsü

lemtetogo.

Nüngdakba tesem nung mozüki ulushitsü atema sorkari maparen balala inyakba mapang lir, ta Health Minister Faisal Sultan-i Mongulbarnü ashir.

"Asenoki anogoshi healthcare system tuluba kumdaktsür, anungji COVID agi shiranger timba akumba atema facility timi agütsütetsü," ta pai ashir.

Pakistan nung Mongulbarnü tashinung COVID-19 agi shiranger ventilator nung nisung 570 liasü, ta NCOC data ajanga sayur. Lahore aser Islamabad nungbo COVID ward tem süngogo, ta doctor temi ashir.

Lahore, Multan, Mardan aser Gujranwala nung Bodhbarnü ventilator shilem 70 dak tema amshia liasü, ta NCOC ajanga ashir.

Pakistan nung nüburttem nem COVID-19 mozü ya February ita nungi agütsü tenzüker aser tang tashinung mozü doses million 2.1 dak tema agütsüogo, ta Planning Minister Asad Umar-i ashir.

Sahel nung nisung million 29 teyari nungdaka lir

Rongchii/April 28, 2021 (Agencies): Sahel region nung aliba linük trok nung nisung million 29 tashi teyari balala nungdaka lir, ta United Nations aser NGO temi ashir.

Mongulbarnü osang ka sangdongba nung parnoki ashiba agi, taoba küm den medemdangra taküm Burkina Faso, northern Cameroon, Chad, Mali, Niger aser northeastern Nigeria nung tang nisung million pongu teyari nungdaka lir.

Tesüiba küm ishika tsungta Sahel anüolen Sahara Desert south tsütsü takong lima ka nung azüdokshi agi timtema arur, kong telungpur telok aika aser linük balala lungjemer tashiyim amshir.

"Sahel nung rara tuluba tali aser tepenjaba akumer aser sepaitem tali shilem agir. Lendong tesashi tali agütsüba, tetsür-tebur tebensa nung ajemdaker azüdokshiba, rakzükraktemba, amokmerenba aser pei aliba tesem nungi jena aotsüsa mapa inyakba ajanga civilian tem ang tali tim atemer,"

ta Sahel coordinator for the United Nations' refugee agency (UNHCR) aser West and Central Africa deputy director Xavier Creach-i ashir.

Northern Mali nung 2012 küm ethnic Tuareg separatist temi sorkar anema nokdaka lia telungpur telok temi atsüngdokba sülen iba region nung rara tenzüker. Telungpur telok ya akoktsü mechi 2013 küm France-i anir nokdaka telungpurtem tesem balala nung prokshi aser asendenshir parnoki 2015 küm central Mali nung campaign tenzüker aser tanem tanemi anasa aliba Niger aser Burkina Faso linüktem nung kongshia ao.

Cameroon aser Nigeria north tsütsü Sahel region aser Chad nunga telungpur telok balala den rara tenzüker liasü.

Norwegian Refugee Council aser Plan International NGOs temi meyongnem agüja aliba Mongulbarnü sangdong nung ashiba agi, nisung million 5.3 shi pei ki yutsür tesem balala nung jenoka lir aser parnok kumzüka

ayutsü nungdaker.

Azüdokshi ajanga iba region nung kaketsü meyririjang aika shibangogo, aser tanur million 1.6 shi chiyongtsü shidak machiba ajanga timtem ajurutsü, ta asadanteta lir.

"West Africa nung nüburttem tepok masüing ayaba asemü agi tali kumogo. Azüdokshi mechi chiyongtsü nung jenjang tali temlokba ajanga chiyongtsü agi anünger," ta UN indang World Food Programme nung regional director Chris Nikoi-ia sangdong ka nung ashir.

Iba region nung nisung meimchir timtem ajurua aliba yaritsü atema senotsü teyari tali nungdaker, ta parnoki ashir.

"Item data aser züngdangba ya kisüing masü saka nisung meimchir timtem ajuruba otsü lir. Rongsen peria melira tensa tamajungba akumtsü aser iba yongji tanur, tetsür aser tebur million aika lendongi aitsü," ta UN Office for the Coordination of Humanitarian Affairs nung regional director Julie Belanger-i ashir.

Latvia nung hotel ka nung mi adok, nisung ti rongset

Riga, Rongchii/April 28 (Agencies): Latvia yimtiba, Riga nung ozüing alema yanglua aliba hotel ka nung kitsük-kirong lendong ataloka nisung ti asü aser aika yiru, ta ketdangsürtemi ashir.

Riga yimti kübok Merkela Street nung aliba storey trok ki tekolakba nung mi jangrua lir, ta Bodhbarnep osang sangdong.

Mi jangrua aliba ki nungi nisung 24 anizük, aser parnok rongnung kar mi agi ronger aser kar mokozü agi saker liasü. Iba lendong ajururtem ya timba bendanger raliwalirtem lir, ta Riga indang mayor-i ashir.

Mayor Martins Stakis-i ashiba agi, ki ya railway station tongtiba anasa lir aser state building telungzük nung lir, aser hostel ama amshitsü atema ketdangsür nungi temelaba agia mali.

Timtem ajurur alirtem jangjatetsü atema police dang nungi teyari meshiogo aser oshi-oben angateteptsü asoshi takotet nübu kar yoka lir, ta pai osangbener dang ashir.

Timtem ajurur alir anenzüktsü atema tesem danga bushia lir, ta paisa ashir.

Iba hostel nung mi lendong

atalokba mapang nisung ti asüba den ano nisung teku kanga mejungi yiru, ta Latvia indang deputy police chief, Andrejs Grishins-i ashir.

Mi remseptsü atema Bodhbarnep 4:43 ako (par mapang) nung osang aru aser mibener aoba mapang ki temaba floor nung mi jangrua liasü, ta State Fire and Rescue Service (SFRS) ajanga ashir.

Iba tesem ya azüngteta lenmangtem shibangogo saka iba ki kishi ua key code amshia ang lapoker asünung tetsükdaksü ajurua liasü, ta SFRS ajanga ashir.

Mi ya anepdang 8:00 ako nung azüoktet aser anüngdang 12:10 tashinung jungjunga remsepteta liasü.

Küm tetenzüklen SFRS ajanga Merkela Street nung iba ki kibur dang kitsük-kirong lendong nungi jenbuttsü mera agibatem osang agütsüsü shia liasü, ta osang ka ajanga ashir. Ajisiüaka osang kecha magütsü aser ketdangsür nem iba ki asadangtsü temelaba magütsü.

Iba tesem nung temesepba mozü amshiba aser COVID-19 ozüing sülen manidakba osang police dangi arua liasü, ta Stakis-i Bodhbarnü tweet asü.

Sri Lanka cabinet-i burqas nokdangtsü molunger

Colombo, Rongchii/April 28 (Agencies): Muslim burqa densema yimjak nung tejak anunga nembanga sü agiba nokdangtsü asoshi onük benokba Sri Lanka cabinet ajanga agizükogo. Iba ya ajanga international law nung aibelentsü ta United Nations nung takotet nisungtemi shiaka linük nung tensa azüoktsü mechi iba mera ya agir, ta ashir.

Public Security Minister Sarath Weerasekera-i benokba ken o ya cabinet ajanga Mongulbarnü senden nung agizük, ta Weerasekera-i pa indang Facebook page nung lemsatap.

Tang iba onük ya Attorney General's Department dangi yoktsü aser ozüing ka akumtsü atema parliament ajanga temelaba agütsüsüla.

Parliament nunga iba onük ya mela-mela agizüktsü akok, kechiaser yangji sorkar lenir züngsem timba lir.

Muslim tsür kari temang aser tejak nembanga agiba sü, koba dang burqas ta ajar, iba ya tamangba yimsü alakteta metsünga-reta amshiba yimya lir aser iba sü nokdangba ajanga national security tajungba kuma renloktsü, ta

Weerasekera-i ashir.

Easter Sunday nung takum bendanga agütsür bomb pokloktsüba lendong nung nisung 260 dak tema takum samatsüba sülen Sri Lanka nung 2019 küm Sri Lanka nung burqas agitsüba yak hen atema nokdanga liasü.

Roman Catholic nunger tekülem ki ana, Protestant church ka aser hotel tulu asem nung lendong agütsüba ya ISIL (ISIS) telok den sendaktepa aliba Muslim nunger telok anati tenüing agia liasü.

Iba sü agiba nokdangba ajanga Muslim nunger temolung yirutsü, ta taoba ita Pakistani Ambassador Saad Khattak-i shia liasü.

Iba tenokdangba ya international law den mapet asütsü aser tamangba yimsü temeden nung aibelener ka asütsü, ta UN special rapporteur on freedom of religion or belief Ahmed Shaheed-i tweet asü.

Nütsüing yongsük million 22 aliba linük, Sri Lanka nung Muslim nunger shilem 9 shi lir, kong Buddhist yimsü amanger shilem 70 dak tema lir. Ethnic kin tila, Tamils, shirnok timba Hindu nunger lir, parnok nütsüing ya shilem 15 shi lir.

Dimapur nung Handloom Expo tenzüksüogo



Kohima, Rongchii/April 28, 2021 (TYO): Development Commissioner for Handlooms tawabangka kübok Office of the Development Commissioner for Handlooms, Ministry of Textiles, Government of India ajanga

senotsü teyari agüja aser Department of Industries and Commerce, Nagaland-i ayongba Special Handloom Expo 'Spring' NERTPS sentong ka Bodhbarnü (28.04.2021) Urban Haat, Dimapur nung tenzüksüogo, ta

sangdong ka ajanga metetdaksü.

Anogo 14 tashi ayonga agitsü aliba Expo sentong ya Additional Director, Department of Industries and Commerce, Nagaland, Vitsuthu Nyuthe-i lapokja liasü.

Ketdangsür sangdong ajanga angazükba agi, sü ataker temi yanglutetba sübosülemsü tapu balala sayutsü asoshi sabang ka agütsütsü aser market tesendaktep tajung ajanga teka agi yangluba sü/süoshi maparen züindaksütsü iba expo nükjiong lir.

Covid-19 wara prokba nokdangtsü asoshi Nagaland Sorkar ajanga tuyuba SOPs ajak nung anidaka, iba expo nung stall 39 tahi lapokogo, ta kasa sangdong nung shia lir.

Mon DC-i Task Force tem inyakyim metetdaksü

Dimapur, Rongchii/April 28 (TYO): State nung Covid-19 tashidak nisung aika dak potetba mapang ka nung DC Mon, Thavaseelan K, IAS-i April 27 nü Mon District kübok yimtsüing aser kiyong balala Task Force tem inyakyim kar metetdaksüogo.

Yimtsüing aser kiyong balala Task Force temi tanga state nungi arurtem indang osang tejangja bendentsü aser Distract Task Force/Sub-Divisional Task Force nem hopta shia osang agütsütsü.

Tanga state nungi arurtem

shirnok ket nung District-i maru tsüingda anogo asem lia tashidak tendangba negative report bena lir, parnok quarantine mesüdaaksütsü. Tangalen nungi arurtemi negative test report indang soft/hard copy bena alitsüla aser ketdangsürtemi asüingdangba mapang sayutsü nüngdaker.

Negative test report bena malirtem ajak aser tashidak keta aliba temaitsü mesayurtem anogo 10 quarantine asütsü.

Osang tejangja agitsü atema Covid-19, DC Office Control

Room den item number; 9862728301/ 6909194471 ajanga tongteprateptetsü, ta DC-isa metetdaksü.

Kasa mapang nung DC Mon, Thavaseelan-isa, April 17 nungi 23 tsüingda District Planning Office, Mon semdang alirtem ajak dang item number 9862078993/8787645487 ajanga osang agütsütsü mepeshia metetdaksüogo.

Maneni nisung ajak dang COVID-19 inyakyim sülen anidaksü aser pei kidang lokti nungi pilaa alitsü metetdaksüogo.

Kutsapo yimtsüing nung VDB ki ka semzük

Dimapur, Rongchii/April 28 (TYO): Tamalen Nagaland Chief Minister inyaka alisang Asür Vamuzo Phesao aser taoba Deputy Commissioner, Phek, A. M. Gokhale, IAS nüngtem nung yangluba VDB ki ka Kutsapo yimtsüing nung Minister, Planning and Coordination, Land Revenue, Parliamentary Affairs, Neiba Kronu ajanga April 27,

2021 nü semzükja liasü.

Yimdaklir temi meranga inyakba atema tenüngsang agüja jembiba mapang, Kronu-i ajaklen renloksü asoshi ayongzükja liasü.

Pai yimdaklir dang kilentzü aoba lenmang anepalua yanglutsü aser mürekmejutsü ajungshi. Paise nüburtem dang tzü nungi adokba rongsen tajungtiba nung amshitsü ayongzük.

Yimtsüing nung terenlok mapa jenti inyaker, anungji nübur ajungtsü atema inyaksüla, ta Minister-i ashi.

Iba sentong nung Zashevezo

Rhakho menden liasü aser VCC Ketsapo, Shevotso Rhakho ajanga sentong nung adener pela agizükba o jembia liasü.

VDB Secretary, Vechikhoyi Lohe ajanga VDB indang ki yangluba nükjiong tatsü agi rateta ashi.

Sentong nung Project Director, DRDA, Phek, Razukhru D. Vasa, taoba CPO tir Sovenyi Chakhesang aser NDPP Candidate Kupota Khesoh nungeria o jembia liasü. Maneni VDB secretary, Dukhuyi Vadeo ajanga tepela ankep o jembia liasü.

NERMSs kübok interview thinena atar

Dimapur, Rongchii/April 28 (TYO): State nung EMRSs kübok Multitasking Assistant, Security aser Mali shimtsü atema April 29 aser 30, 2021 anogotem personal interview agitsü aliba thinena atar, ta Joint Director (HoD) cum CEO NEMRS Management

Society, Directorate of Tribal Affairs, I Sino Phom ajanga sangdong ka nung metetdaksü.

State nung Novel corona virus cases kanga sashia akumba ajanga iba mera ya agitsüsa akumer, ta sangdong ajanga ashi.

NAGALAND EMRS MANAGEMENT SOCIETY

A Registered Society under the Aegis of Tribal Affairs Department
GOVERNMENT OF NAGALAND

NOTIFICATION

Kohima, Dated the 28th April, 2021

No.DTAN/EMRS-60/2021: In supersession to this Office Notification of even number dated 20.04.2021, and in view of the steep rise of Novel Coronavirus positive cases in the State, this is to notify all the candidates that the personal interview for recruitment of Multi Tasking Assistant, Security and Mali under various EMRSs in the State, scheduled to be conducted on 29th and 30th of April 2021 is hereby postponed until further order.

(I SINO PHOM)

Joint Director (HoD) & Chairman cum-Ex-Officio CEO, NEMRS Management Society, Directorate of Tribal Affairs.

Issued by DIPR

MULUNGNEŊ

Ozü temeimtiba asür **Pangerküzmük Jamir**, Tanelar wadang nung mesenseni nokdaka lia tia makai alishi temang nung tashitak agi meneper taneptsü bushia Tsüingrem dak teimla tulu yur bendang balala sema jajaogo. Pa shirang anogo nungi tenzükja akümüli wadang atemba anogo (23 April 2021) aser tang tashi lokti tentet, Arogo aser kija kibong shirnokisa sarasadem nüktzü, ali rongsen aser shisatsü agi onok dang meima yaria nungidagi, nenok ajak dangi tsüingtong marutet nung iba zülü ajanga kangasa pelaba lemsateper. Tsüingremi nenok mapa tajung yari meyipa moajang ta kinungertem ajaki sarasademtsür.

Meshi melitet nung teküboklen agüja aliba lokti kar dang alakteta pelaba lemsateper :

1. Khanimu Baptist Arogo, ministry balala
2. Khutak Prayer Center, Longjang
3. Longjang Baptist Arogo
4. Longjang Compound Women Ministry
5. Alongchen Baptist Arogo
6. ABAM Impur
7. Süngratsü Baptist Arogo
8. Longpa Baptist Arogo
9. Kiphire Baptist Arogo
10. Lamedong Youth

Temeim Kinungtsü, Chirnur aser Kinungertem.



OFFICE OF THE
SABANG ZÜNGAR
CHANGTONGYA VILLAGE
MOKOCHUNG; NAGALAND: 798613

TEPELA LEMSATEPER

All India Football Federation (AIFF) ajanga Referee Identification Number (RIN) tatidang December 2020 agiba nung züngapur rongnungi **Wb. Takatemsu-i** takok anguba asoshi pa nem tenüngsang agütsür. Pa ya Aor rongnungi RIN angur mezüingpur lir.

Pai inyaka aruba kar :

1. Kohima Town Club nung Referee ka.
2. Guwahati nung International Veteran Gold Cup nung November 2018 nung Referee liasü.
3. Sir. Churachand Singh Memorial Football Tournament, Imphal (Second oldest Tournament in India) nung December 2019 nung referee süa liasü.

Tsüingremi maneni pa wadang nung azükaru südakjangma ta sarasademtsür.



Sd/-
A.CHUBAYANGER LONGKUMER
Secretary

Office of the General Manager
The Nagaland State Dairy Co-Operative Federation Ltd.
Mokokchung Unit
Regd. NO.NL/5809/Dt.12-03-2002
Near Power House, Mokokchung - 798601, Nagaland

INFORMATION

This is to inform to all the consumers/public that due to cost escalation of packaging materials, commodities, transport charges etc., the management is compelled to increase the price of MILKCON PRODUCT as follows: -

1. DAHI/LASSI wholesale rate Rs. 410/-per carton
2. DAHI/LASSI retailer rate Rs. 20/- per cup

With effect from 1st May, 2021. We request all our valued customers to bear with us for the unavoidable cost enhancement.

Sd/-

General Manager
Mini Dairy Plant,
NSDCD Ltd. Mkg Unit.

SANGDONGER

Lt. Imokokba ji kü chir/jabaso masü. Anungji pa dak sendakba ken-o nung ni tesendaktep mali.

Marinba (Chuchuyimpang)
Dimapur : Nagaland.

45 AR Shamator-i anti-Covid-19 drive ayongzük

Shamator, Rongchii/April 28, 2021 (TYO): Linük aser

state nung Covid-19 wara tanaben adokba dak sendakba nung, Hombarnü (26.04.2021) 45 Assam Rifles, Shamator, Tuensang-i SBI office, ADC Office, Shamator College aser shishilembaba tesem tem densema Shamator jila kübok tesem balala nung anti-Covid-

19 drive sentong ayonga agiogo.

Bodhbarnü, 45 Assam Rifles, Shamator, Tuensang-isa Leangkonger yimtsüing nung Awareness campaign ayongzükja liasü. 45 Assam Rifles indang Dr. Jacob 2nd I/C-i anir iba Campaign agiogo, ta sangdong ka ajanga metetdaksü.

Mulungsoa plasma tenla agüjang: Rishabh Pant

New Delhi, Rongchii/April 28, 2021 (Agencies): Bodhbarnü, Indian Premier League (IPL) nung Delhi Capitals (DC) captain, Rishabh Pant-i, Covid-19 wara nungi kümzüker/taneptsü angurtem dang tangatetba tajung nung aser mulungsoa 'blood plasma' tenlatsü mepishiogo, ajiasünungang iba tashidak agi kanga mejungi shiranga alir taküm kümzüksü akok, ta pai ashi.

Video message ka ajanga wicketkeeper-batsman Rishabh-i, "Tesiüba ita ishika tejakdang nungi India nung Covid-19 tashidak puteter timba küma arudar. Na iba wara nungi taneptsü ngur alinungbo, imlibilema plasma tenla agüjangma," ta lemsatep.

Rishabh-isa iba wara dak sendakba nung, osang tai/olulu



osangtem meporokshitsü asoshi nüburttem ayongzüka liasü.

"Iba wara ya kangrabo pungba magizüksü aser Sorkar den Health takotet temi teyuba nung anidaksü asoshi ajak dang mepishir. Covid relief dak sendakba osangtem jung junga jangjar sülen ang tangar den lemsateptsüla," ta DC captain

Rishabh-i shisem.

Mongolbarnü, DC opener Shikhar Dhawan-ia Instagram sabang ajanga, "Pei adianu taküm kümzüksü mechi nisung aikati blood bank aser mozüki nung azü tenla agutsüdaki. Na Covid-19 nungi taneptsü ngur lira, taküm ka kümzüksü asoshi nü dak tashi lir. Iba ya amajok tekümdaksü. Nai azü tenlatsü mulunga aser temoatsü ngunera Fever FM nung connect ser Project Plasma nung shilem agiang," ta lemsatepa liasü.

"Tang ama tensa tamajungdang, adianu, kinunger aser medemertem anema alibaji asenok ajak atema tajangzük aser tongtibang lir. Nü teyari ajanga asenok ajak longjemer iba virus koktettsü aser meimchir taküm kümzüksü akok. Plasma tenla agüjang," ta Dhawan-i shisem.

Nuwan Zoysa küm tork atema asaya nungi nokdang

Dubai, Rongchii/April 28, 2021 (Agencies): Ochimashi inyakba maparen nung temulung melemi bilemba Indian bookie ka ajanga osang tejangja magütsüba aser match fixing asütsü merangba dak sendakba nung aibelenba aliba apuba sülen, Bodhbarnü taoba mapang Sri Lanka nung fast bowler aser coach Nuwan Zoysa küm trok atema cricket asaya ajak nungi anentsüogo.

Abilen bowling aonsang, Zoysa cricket asaya nungi küm trok atema nokdangba maparen ya 2018 küm October 31 nü pa tatsüka atema asaya nung anentsüba mapang nungi tenzüka ken o benoka liasü.

"National coach ka ama, pai iba mapa ya khuret bena ochishia inyaka alitsüba. Ajisüaka, iba melen pai ochimashi inyaker den ang teka amtep aser tanga nisung tem ochimashi maparen nung anioktsü merang," ta sangdong ka ajanga ICC General Manager - Integrity Unit, Alex Marshall-i metetdaksü.

"Asaya ka akoktsü/makoktsü (match fixing) asoshi meimbanga sübokrem mapa inyakba jagi sasiapong jenjang raksatsür aser iba wadang ashioktsür ama lir. Cricket saisapong nung iba amala maparen magizüksü," ta Alex-i ashi.

Arishi küm 42 tain Zoysa, shibai Sri Lanka team atema Tests 30 aser ODIs 95 asayaogo, 2017 küm UAE kübok ayongba T10 asayamung nung Sri Lanka team atema bowling coach ama inyakba sülen, 2018 küm pa anema mezüing ken o benoka liasü.

ICC-i ashiba agi, Sri Lanka A indang bowling coach ama inyaka aliba mapang, 2017 küm Colombo nung Zoysa ya temulung melemi bilemba Indian bookie den meyetpeladakja liasü.

Iba dak sendakba nung mapang tatsüka asadangshia jembiba sülen, taoba mapang bowler Zoysa-i ICC document tem nung agüja aliba Mr W nisungba ya match fixing maparen nung dena lir ta meteta aküm aser asüngdangyatsü atema Zoysa jaoktsü sentong yanglu, kechiyong coach ka ama pai asayar yimyattem meteta lir aser match fixing atema pai asayartem den asalentong yanglutsü lenmang lir," ta ICC-i ashi.

"Temulung melemi bilemba (Mr W) temepishiba nung, 2017 küm tatemlen Mr Zoysa-i pa (Player A) den ajurutep aser kasa küm Sri Lanka-i Bangladesh aser Zimbabwe na den asayatsü aliba series nung over ka nung run 12 nungi 15 tashi agütsütsü mulunga lir asünung; ajita masüyongjia batting mapang run aika meyanglui kara out asütsü asüngdang," ta ICC ajanga agütsüba o bendang nung shia lir.

"Iba yimya nung asayatetra Mr Zoysa-i pa (Player A) nem sen aika agütsütsü akok ta ashi. Idangjisa, pai (Player A) iba sentong magizük aser iba ama maparen nung adentsü memulunger ta Mr Zoysa dang ashi," ta kasa sangdong nung shia lir.

Iba inyakyim dak sendakba tashishiba aser ken o ajak angadanger sülen, Tribunal-i match fixing inyakyim tsütsü tangar anioka shilem agidaksütsü merangba nung Zoysa aibelenba aliba putet aser iba den külemi ochimashi inyaker ajanga aibelenba nung osang tejangja magütsüba asoshi pa dak tai puogo.

T10 League atema ECB Anti-Corruption Code indang temzüing asem nung aibelenba puteta Emirates Cricket Board tenüing nung ICC-isa Zoysa

anema ken o benokogo aser iba ken o tejembidak lir.

Taoba mapang nung Sri Lanka A team atema Zoysa-i bowling coach ka ama inyakogo.

Ochimashi inyakba atema ICC ajanga Cricket asaya nungi nokdanga alir Sri Lanka nung cricket asayar rongnung Zoysa ken o ya tasen alitsü.

April ita tetenzüklen, taoba mapang fast bowler Dilhara Lokuhettige-a ICC Anti-Corruption Code anema aibelenba inyakba putetba sülen, küm 8 atema cricket asaya ajak nungi pa nokdanga liasü.

Ano külen, Anti-Corruption Unit (ACU) investigation sentong nung manidakba atema 2019 küm Sanath Jayasuriya-a asaya nungi nokdanga liasü.

Kasa temzüing kübok taoba mapang Sri Lanka offspinner Jayananda Warnaweera-a 2016 küm cricket asaya nungi nokdanga lir.

Madrid Open nungi Djokovic tukuogo

Madrid, Rongchii/April 28, 2021 (Agencies): ATP Masters 1000 asayamung atema senzisenbong masütsü lemtetba sülen, World no. 1 Novak Djokovic-i taruba hopta Madrid Open title toktepa nung shilem magitsü, ta Bodhbarnü asayamung ayongertemi metetdaksü.

Taoba hopta Serbia Open asayamung nung arishi küm 33 tain Djokovic-i tesüsa shilem agiogo. Russia nung Aslan Karatsev-i Djokovic metsükdaksüdüng pai iba asayamung semi-final tongteta asayaogo.

"Taküm Madrid asayamung nung shilem magitettsü aser fans den majuruteptetsü. Iba osang atema kü dang tai

tokangma," ta Djokovic-i lemsatep.

"Iba asayamung nung shilem agir sülen küm ana tashi shia aruogo. Taruba küm taküm tajung nung nenok ajak den ajuruteptsü imlar," ta pai ashi.

Alima ajanga asüngba COVID-19 wara ajanga 2020 küm Madrid Open asayamung thinena liasü. 2019 küm pai iba asayamung title bena lir aser taküm-a kasa wara tenokdangba ajanga pai iba asayamung nung shilem magitsü lemtet.

Ajisüaka, Djokovic-i taruba ita Rome Masters aser Belgrade Open nung shilem agitsü imlar. Iba sülen May 30 nü nungi Paris asayamung tenzüksü.

Baku nung Shooting World Cup masayatsü

New Delhi, Rongchii/April 28, 2021 (Agencies): Tokyo Olympics tenzüksü aliba tejakdang Baku, Azerbaijan nung asayatsü aliba ISSF World Cup athir. Azerbaijan nung Covid-19 wara aliba ajanga iba shooting asayamung magitettsüsa akümer.

Iba asayamung June 21 nungi July 2, 2021 tashi asayatsü renem aser Tokyo Olympics atema qualify ser alir shooter ajak atema World Cup ya renemshiba asayamung tajung ka ama asayatsü liasü.

Azerbaijan nung Covid-19 wara tanaben adokba ajanga Baku nung ISSF World Cup ayongtsü asoshi timtem adoktsü ta Azerbaijan Shooting Federation (ASF)-i International Shooting Sport Federation dang osang agütsü," ta ISSF sangdong ka ajanga metetdaksü.

"Tekalen agüja aliba

asadanga, ISSF World Cup Baku 2021 masayatsü osang jangjatsür," ta ASF-i ISSF dang metetdaksü.

"Iba osang atema onok dang tai dokang aser iba timtem angatetsüla, kechiyong asayamung nung shilem agitsüpur ajak iba tesashi wara nungi kümzüka yutsütsü tongtibangtiba asünung, asayamung thitsütsüba dak alaka tanga lenmang kecha mali," ta kasa sangdong nung shia lir

Tokyo Games nung India nungi shooter züngsem 15 contingent kati shilem agitsü aser iba Olympics metenzükdang, Baku nung telungjem World Cup ya tatembuba international asayamung ka ama asayatsü liasü.

Tokyo Olympics Games ya July 23 nungi August 8, 2021 tashi asayatsü renemer lir.

Mekümdangba agi state nung...

(Tapak 1 nungi...)

"Nüburttemi dang department den amalitepa inyakra iba wara anema raraba nung timtem majurutsü, kechiyong tang senotsü tali indokbaji lokti azüokba nung indoker," ta pai ashi.

State nung oxygen peria maliba dak sendakba nung pai, State nung oxygen plants 11 alitsü- PM Cares fund nungi asem aser UNICEF & UNDP nungi ti angutsü, ta metetdaksü.

Tang tashi nungbo state nung oxygen peria lir, kechiyong state nung oxygen refilling centres ana- Dimapur aser Kohima nung kaka lir aser iba nungji anogo shia cylinders 500 refill sütettsü, ta paisa metetdaksü.

Oxygen yipten dak sendakba nung pai, Nagaland nung hospital tulu mali, saka achayangdar aser department-i sorkar dang nungdakra oxygen yipten atema

sorkar meyong kiojen lemküjjang ta shiogo, ta metetdaksü.

Kanga kodamasüba tensa ajurura Epidemic Act kübok nija hospital tema mekazüksü, ta pai ashi.

COVID-19 vaccines dak sendakba nung Dr Medikhu-i, April 26 nü state-i vaccine dose lakh 1 agizükogo aser Centre-i ano tali agütsüsü melunga lir, ta metetdaksü.

Paisa ashiba agi, arrshi küm 18 nungi 44 tsüngdapurtem vaccine agitsü atema registration inyakyim tenzükgogo ajisüaka maneni vaccine agizükba sülen ang vaccination tenzüksü.

"Tang state nung arrshi küm 18-44 tsüngdapur nütsüing lakh 8 shi lir, aser India sorkari state dang vaccine alizüksü metetdaksüogo saka state sorkari akokba tashi vaccines ji angati agütsütsü telemtetba agiogo," ta Dr Medikhu-i metetdaksü.

Coronavirus wara tanaben prokba mapang nung tamajungba kongshirtemji arrshi küm 20-30 tsüngdapurtem lir, aser taküm January nungi April 18, 2021 tashi nung parnok 243 dak iba tashidak putetogo, ta State Nodal Officer, Dr Nyanthung Kikon-i metetdaksü.

BILEMDANGANG

"Mashimaluri jembiba nung tashitemeteri teti shisadanga bilemer."